



Naseatüpler 1989

BAUE STEHT uf

Vor churzem si mir durch Laufe spaziert
I dr Nase bohrend umenanger stolziert
Mir hei gluegt und gstuunt und s'fascht nit glaubt
was me bi eus alles für Sache baut.

Als erscht's si mir s'Spital go bsueche
um a paar schöni Meitli z'sueche
Doch dört wird glärmt und dräggt und ghämmeret
d'Patiente si scho ganz belämmeret
Statt Schweschtere finge mir Bauarbeiter
und Döcter i dä Ueberchleider
Mir hei a Docter gfrogt wie's goht
er het's denn gseit wie's um'en stoht:
Für d'Narkose geb's jetz Bache stei
und Strom geb's o scho lang me kein
Nur d ' Stämpfeluhr , das sig jo klar,
funktionieri wunderbar.

Do si mir witer, gege d'Räbe
und stöh ganz plötzlich vor so Gräbe
a grosses Loch, mir stuune numme
das choschtet doch a riese Summe!
"GORPS" stoht do , doch was isch das?
Git's do ächt wirklich Bier vom Fass?
Trotz allem grüble i dr Nase
(mir si no i dr Chinder-Phase)
isch's eus nit glunge usezfinge ,
was die wei baue so wit hinge.
Do seit dr eint mit strengem Wort:
"S'isch klar, das isch dä gheimi Ort
wo d'Bärner s'neggschte Geld alegge
um's vorem Bundesricht z'verstege!"

Do si mir denn is Stedtli gange
und gseh ä Bärli a dr Fahnestange
Dr näbe isch's Podescht erbaut
für ein wo i dr Politik ergraut
Zwöi drü Lütli stöh umme und warte
si hei chalt und wette das Feschltli starte
Doch dä Ma chunnt nit so schnäll
er steggt no z'Moutier im Tunnäl
Im dunggle Loch si d'Grossröt gstange
wie d'Bäre im Grabe si die dört gfange
Zum Glück goht s'Liecht gli wieder a:
ueberrascht luege si dr Schmidli a:
Duet er sich schäme isch's us Wuet,
dass si Biire so rot lüüchte duet?

Mir laufe witer , göh zur Brugg
was mir dört gseh isch denn verruggt:
Grad duet das Grüscht i's Wasser gheie
mir höre Fliech und ängschtlich schreie
Doch d'Bauarbeiter si jo flinki Lüt
Noch gwagtem Sprung passiert'ne nüt
Fascht hätte mir s'erscht Mol sit Johre,
dr schnällschi Birsfisch i dr Birs erkore!

Strosse , Konsi, s'wird überall baut
Bahnhof, Schuel, sogar d'Auto stauts
Mir hei Freud und stuune numme,
doch nach dr Brugg die mir verstumme
Mir stöh ganz plötzlich, s'isch ä Gruus
vor däm schreckliche Lotterihaus
Vor Johre hei mir's, das isch kei Witz
i dr Gmeindsversammli bewilligt als Alterssitz
Doch sig's so schön z'Nacht, meint do dr Kärn
Me gseh'ch durchs Dach so villi Stärn!

S'git alti Hüüser, das macht is muff
drum wie mir baue, denn baue stellt uff!